



En memoria da  
**Giusep Loretz**  
14.11.1929 – 12.09.2011

Il padrin Giusep Loretz ei naschius ils 14 da november 1929 egl uclaun da Selva sco fegl da Gion Antoni Loretz e Maria Constanzia Loretz nata Berther. El ei naschius sco 6avel affon da 11 fargliuns. A Selva ha il Giusep giu ina biala affonza el ravugl d'ina famiglia muntagnarda, la quala ha fatg il pur.

La veta dil car Giusep ei stada pauc spectaculara. Tochen tier la mort dils geniturs ei il Giusep adina staus a Selva e segidaus cun ils geniturs el menaschi puril. 1965 ha el bandunau Selva e serendius a Rueras tier la sora Maria ed il quinau Giusep Caduff. El niev dacasa ei il Giusep sesentius bein. La sora Maria ha adina giu bien quitau ed el ei segidaus nua ch'ei fageva basegns.

Duront il temps d'unviern ha el adina luvrau tier las pendicularas e duront la stad eis el serendius a d'alp. El gudeva la cumpignia denter ils luvrers dallas pendicularas, denton era il contact cun ils hospes, ils quals appreziavan sia aviarta demanonza e sia curteseivladad. Duront las biaras stads, la grond part sco paster grond, han ils purs dalla Val saviu fidar lur muvels al Giusep. Per la fumeglia e cunzun per ils buobs d'alp haveva il Giusep adina bien quitau. El era in bien patrun da buna luna. Biaras historias e schabets da Selva raquintada el duront il temps sin pastira.

Denter ils temps d'unviern e stad gudeva il Giusep las spassegiadas ella vischionnonza e sia preferida cigarette. Era mava el bugen cun ses collegas tier in sitg e gudeva la cumpignia.

Igl onn 2009 sto il Giusep serender cun la sora Maria ella Tgèsa s. Vigeli. Per propi ha el adina schau encrescher e fuss pli bugen staus a Rueras. Denton han las forzas adina schau suenter e suenter cuorta maldispostadad eis el sedurmentaus en gliendisdis avonmiezdi. El ei vegnius deliberaus dils mals e dil pitir ed ha astgau bandunar il terrester. Nus tuts astgein esser engrazieivels per ils bials onns che nus havein astgau passentar ensemens cun tei. Anavos restan bialas regurdientschas. Tia buntadeivladad e carezia salvein nus per adina en nos cors.

Car padrin Giusep, ruaussa en pasch  
tia figliola Conny Caduff